

Sabiduria den nos alegria

Skirbi pa Ruthy "Lady Ruth" Vrieswijk-Bergen

A tuma un par di dia pa kom bij di e dushi vakantie na Madre Patria cu famia. Y ya nos a cumpli cu algun otro famia, atende entierro di nan sernan keru cu a bay nos dilanti y nos a bishita famia di un amiga, cu ta sufriendo kebrante di salud, pa nos por a canta algun cantica cu nan, despues cu Pastor Jairo a haci un oracion bunita cu nan. Ta momentonan pa duna forza y alegria e alma y curason sigur!

Den siman tray lomba Lady Ruth a bishita tambe e bunita exposicion di Sclavitud y Libertad cu tawata exhibi den e sala di e Museo den Fort Zoutman Willem III Toren den su ultimo dianan, y a wordo ricibi calurosamente pa e cabayero semper atento y servicial trahando keto bay, Roy Feliciano, y a topa cu Nicole y Shaz di New Jersey y despues tambe Jody, e pareha di Andre e artista pintor, a yega. Un tema doloroso pa akibandanan tambe di mundo, specialmente riba nos islanan ruman Corsou y Bonaire.

Nos no a haya mucho les di esey na scol of no a haya mes antes tempo di nos hubentud. Of ta asina hopi tempo pasa, cu nos no ta corda di a haya esaki como parti di "geschiedenis" na scol. Ta te ora cu Lady Ruth a bay Bonaire wak e slavenhutjesnan y bay Corsou y wak e museo Cura Hulanda cu nos a keda impacta cu hendenan tawata wordo trata malo y bendi como esclavo etc. pa motibo di nan color di cuero. Hopi pero hopi tristo mes! Danki Dios cu ya ta basta aña cu nan a wordo libera. E exposicion den Fort Zoutman tawata di e artista di Merca, Andre Henderson cu a laga demostra su bunita obranan di arte di lama den e olanan brabo cu a guli acepta y ricibi esnan cu a muri abordo cu a wordo tira na awa, y duna nan paz.

Por a wak un obra di baile prome cu nan a wordo gara como esclavo y hopi mas obra den colornan bunita exhibi, colornan colorido cu mester purba tapa e dolor di e tema scur y doloroso aki di sclavitud. Of pa accentua e sentimentonan di paz y tranquilidad den nan alma fuerte cu si no por a wordo horta of kita fei nan. E fecha di Abolicion di Sclavitud cerca nos y Surnam ta 1 Juli 1863. Danki na e. o. sra Maria Silva Hart di Vibration PR cu a laga trece e exposicion aki Aruba. Lady Ruth a atende e entierro di John Zara di Dakota y por a saluda amigo Netto y tambe ruman Juffrouw Grace Zara, desea nan tur hopi consuelo y amor.

Un of dos dia despues Ruthy a atende e entierro di Rory Arends, un legendario y pilar den turismo. (Tawatatin 3 dia cu e oportunidad di condoleer pa Rory y nos a logra bay e ultimo dosnan) Nos por corda con bunita e cantante Hulandes Frank de Jong a canta cancionnan bunita di Frank



Sinatra y e speech bunita di un cabayero colega amigo den turismo di Rory, tempo di nan tempo. Nos a honra e deseo di Aby, e yiu muhe di Rory y Lucy awe ambos den felis memoria, y a inspira y recita un bunita poema cu Dr. Roderick "Rory" Arends na mente, alma y curason. Mi kerido esposo a conoce Rory, tempo Johan tawata traha cu computer pa toeristen-buro hopi aña pasa.

Nos a conoce Lucy y Rory como un pareha dinamico den turismo. Lucy tawata traha den oficina na Aruba Beach Club/ Casa del Mar e tempo ey, mientras su esposo Rory tawata briya cu su bon idea, proyecto y trabaonan den turismo all over. (E di 3 dia di condoleer pa Rory, Ruthy tawata contento di por a topa un ratito asina cu sra. Myrna Jansen Feliciano y Glennys Tromp ambos tambe pilarnan den turismo, nan tambe a of ta traha pa hopi aña cu hopi pasion den e ramo turistico. (Nos otro compromiso no a duna nos bay mas tempran e mainta aki, pero si na tempo pa a scucha un sra. canta e cancion "Vaya con Dios" masha masha bunita mes y duna Aby un extra bearhug). Lady Ruth tawata traha den activities como social hostess na Aruba Beach club/Casa del mar den añanan nobenta asina, y ta corda e dos bunita cara y curasonnan aki di Myrna y Glennys. Un otro pilar den turismo: Jan van Nes. Awor cu su mesun restaurant Peruano cu cuminda hopi pero hopi dushi mes! Un bearhug pa bo lieve Jan van Nes, unda cu bo por ta!!!

Nos a haci conoci despues tambe cu Abigail "Aby" Arends cu tambe a bira un profesional den su ramonan di trabao y tambe cu e tokenan spiritual di su bunita mama Lucy, cu ta un di e rumannan bunita di nos amigo Pedro "Shon Pe" Krozendijk y di e elegante Sra. Filomena Croes. Un famia bendiciona pues cu a y ta duna Aruba di nan capacidanan profesional cu amor. Rory dfm tawata gusta bay pasa ratonan agradabel cu su amigo y amiganan na e happy hournan di Djiespies ariba Diabierna. El a wanta duro te na ultimo, pero a acepta e yamada di su Creador di amor y a bay sosega hunto cu su bunita sra. esposa Lucy. Nos condolencia, consuelo y hopi amor na lieve mooie Aby, na demas famianan, amigonan tur. Un "bearhug" grandi di Lady Ruth!!!